

PEMBERITAHUAN PERTANYAAN BAGI JAWAPAN BUKAN LISAN

MESYUARAT PERTAMA, DEWAN RAKYAT

PENGGAL KEENAM, PARLIMEN KETIGA BELAS

MAJLIS MESYUARAT DEWAN RAKYAT

PERTANYAAN : JAWAB BUKAN LISAN

DARIPADA : DR MANSOR BIN ABDUL RAHMAN [SIK]

TARIKH : 5 MAC 2018 (ISNIN)

SOALAN :

Dr Mansor Bin Abdul Rahman [Sik] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah langkah standard operasi (SOP) yang telah ditetapkan oleh Kementerian dalam menyediakan pusat jagaan kanak-kanak dapat membantu pihak-pihak yang berminat dan sejauh manakah pemantauan dilakukan oleh Kementerian dalam menangani pusat jagaan supaya tidak berlaku hal-hal yang tidak diingini.

JAWAPAN: YB DATO' SRI ROHANI ABDUL KARIM, MENTERI
PEMBANGUNAN WANITA, KELUARGA DAN
MASYARAKAT

Tuan Yang Dipertua,

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat Malaysia (JKM) telah diberi tanggungjawab menguatkuasakan Akta Pusat Jagaan 1993 dan Peraturan-Peraturan Pusat Jagaan 1994.

Langkah standard operasi (SOP) yang digunakan oleh KPWKM untuk memastikan kanak-kanak yang ditempatkan di pusat jagaan kanak-kanak mendapat hak dan kebajikan yang sewajarnya ialah berdasarkan kepada Peraturan-Peraturan Pusat Jagaan 1994. Setiap pengusaha pusat jagaan hendaklah mengikut keperluan dan kehendak yang dinyatakan di dalam peraturan yang telah ditetapkan.

Berdasarkan kepada Peraturan-Peraturan Pusat Jagaan 1994, setiap pengusaha pusat jagaan hendaklah mengikut standard yang digariskan di dalam peraturan yang telah ditetapkan bagi memastikan hak dan

kebajikan kanak-kanak adalah terjamin. Peraturan menggariskan seperti berikut:

- i. **Peraturan 6**, pengendali sesuatu pusat jagaan berkediaman hendaklah memastikan penyimpanan dan penyenggaraan rekod harta, rekod kesihatan, rekod/surat-surat kebenaran bagi rawatan perubatan setiap penghuni daripada ibu bapa atau penjaga sah atau saudara penghuni itu.

- ii. **Peraturan 7**, tiap-tiap pusat hendaklah mengadakan suatu program aktiviti harian yang telah diluluskan oleh Ketua Pengarah yang meliputi:
 - (a) Kemudahan latihan, aktiviti agama dan rekreasi bagi penghuni atau orang yang diterima untuk jagaan;
 - (b) Kemudahan rawatan dan terapi bagi penghuni atau orang yang diterima untuk jagaan yang berkenaan,dan dalam mengadakan program itu, keperluan sosial, emosi, fizikal dan **intelektual** penghuni atau orang yang diterima untuk jagaan hendaklah diambil kira.

- iii. **Peraturan 14**, keluasan minimum ruang lantai yang dikehendaki bagi setiap penghuni atau orang yang diterima untuk jagaan hendaklah seperti berikut:
 - (a) Kanak-kanak di bawah umur sepuluh tahun – 3.5 meter persegi.

- iv. **Peraturan 17**, pengendali tiap-tiap pusat hendaklah menyediakan suatu skim yang praktik bagi pengosongan premis pusat itu sekiranya berlaku kebakaran.

- v. **Peraturan 19**, tiap-tiap pusat hendaklah mengadakan sekurang-kurangnya satu tandas bagi tiap-tiap lima orang penghuni dalam keadaan cuci dan bersih.

- vi. **Peraturan 20**, bekalan air yang mencukupi perlu diadakan.

- vii. **Peraturan 21**, tiap-tiap pusat jagaan berkediaman hendaklah menyediakan kemudahan tempat tidur, membasuh pakaian dan bilik mandi berasingan bagi penghuni lelaki dan perempuan.

- viii. **Peraturan 22**, semua makanan dan minuman yang disediakan hendaklah sempurna dan bersih serta mematuhi skala diet yang diluluskan oleh Ketua Pengarah.
- ix. **Peraturan 24**, pengendali pusat jagaan hendaklah membuat pemeriksaan perubatan kepada penghuni bila masa perlu.

Kesemua yang dinyatakan di atas wajib dipatuhi oleh semua pengusaha pusat jagaan. Mana-mana pengendali pusat jagaan yang melanggar atau gagal mematuhi mana-mana peruntukan Peraturan-Peraturan adalah melakukan suatu kesalahan. Apabila disabitkan, boleh didenda tidak melebihi satu ribu ringgit atau dipenjarakan selama tempoh tidak melebihi enam bulan atau kedua-duanya sekali.

Tuan Yang Dipertua,

Bagi memastikan tahap penyampaian perkhidmatan pusat jagaan termasuk pusat jagaan kanak-kanak yang dikendalikan oleh pihak swasta berada di tahap yang tinggi, Kementerian melalui JKM juga menjalankan pemantauan ke pusat jagaan berkaitan.

Di antara bentuk pemantauan yang dijalankan ialah:

- (a) Menjalankan aktiviti pengesanan ke Pusat Jagaan dan TASKA tidak berdaftar sepanjang masa dan memberi peringatan supaya berdaftar dengan JKM;
- (b) Menjalankan pemeriksaan berkala dan mengejut ke premis Pusat Jagaan dan TASKA oleh Pegawai Diberi Kuasa; dan
- (c) Mengambil tindakan penguatkuasaan seperti di dalam peruntukan Akta Pusat Jagaan 1993 dan Akta Taman Asuhan Kanak-Kanak 1984 seperti Arahan Bertulis, Tutup Sementara, Batal Pendaftaran, Lak, Kompaun dan menjalankan pendakwaan di Mahkamah.